

Monday, June 30, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

REMNA NI

Chief Minister Pu Lalduhoma chuan vawiina Remna Ni hman chuan hnamdang leh sakhaw dangte nena inremna thlen se a duh thu a sawi.

Vawiina Mizoram Zirlai Pawi (MZP) buatsaih Remna Ni vawi 39-na Lammual-a lawmnaah he thu hi sawiin Chief Minister Pu Lalduhoma chuan Sairang rel kawng chu hawn mai theihin an peih tawh a, Prime Minister hman hun an nghak tih a sawi a. Union Railway Minister Ashwini Vaishnaw nen pawh an inkawm tawh thu sawiin, Sairang Railway Station chu khawvel railway station dangte el pha, world class a siam turin a phal sak tih a sawi a. India rama rel chak ber chi Rajdhani service pe tura an dilna chu a phal sak bawh tih sawiin Sairang atangin Tripura, Sairang atangin Kolkata, Sairang atangin Delhi Rajdhani service a awm dawn a ti a. Hnamdang an lo luh zel dawn avangin ILP chungchangah te tihtur nasa tak an nei dawn a ti a. Tunlai thiamna a thlunkhawm vek anih tawh dawn avangin Mizote chu sakhaw dang bia te, tawng dang hmangte, hnamdang nen chen ho thiam a ngai dawn tih a sawi a ni.

Byte: Chief Minister Pu Lalduhoma

Chief Minister chuan Akyap, tuna Sittwe an tih tak lawng chawlhmun pawh turin KMTTP kawngpui laih chu zawhfel tep a ni tawh tih sawiin he kawngpui hi a tlang chuan Mizoram mai ni lovin India ram insumdawnna kawngpui a ni dawn tih a sawi a. Mizoram kawtchhuah chu chhim lamah a insawn tawh dawn tih sawiin, chu chuan nasa takin Mizoram a nghawng dawn a, chumi atana lo inbuatsaih dan tur rel turin Chief Secretary hnenah Study team a din tir tih a sawi a ni.



NEW MIZORAM STATE BJP PRESIDENT ANNOUNCED

Dr. K. Beichhua, MLA chu BJP Mizoram State President thar atan puan a ni.

Central BJP-in National RO for Mizoram atana an ruat, BJP National Mahila Morcha President Pi Vanathi Srinivasan chuan vawin khan Atal Bhawan, Aizawlah BJP Mizoram State President thar atan Dr. K Beichhua chu chuhtu awm loa President atana thlan a nih thu a puang a. Pi Vanathi Srinivasan chuan nimin Pathianni khan BJP Mizoram State President thar hi inlungual taka thlan a nih thu sawiin, inthlanna chuhtu awmchhun, Siaha Bialtu MLA nilai, Dr. K. Beichhua chu kum 2027 thleng President a ni dawn a ti a, term hnih chhung BJP Mizoram State President lo ni tawh Pu Vanlalhmuaka a thlak dawn a ni.

Byte: Vanathi Srinivasan

BJP Mizoram State President thar Dr. K Beichhua chuan thu sawiin an party chu a bulthut atanga tihchak a ngaih thu a sawi a. Unit tam zawk nei thei turin hma an la chho zel dawn tih a sawi a. Dr K Beichhua chuan Mizoramah BJP chu Kristian dotu party tih deuhthawa hriat a ni thin tih sawiin Mizo mipuite hnenah BJP chu Kristian dotu party ni lovin Prime Minister Narendra Modi-a'n ram tihhmasawn, Viksit Bharat, Viksit Mizoram chu a thupui ber a ni tih zirtir a pawimawh hle tih a sawi a. BJP in hmasawwna a ngaihpawimawh zia mipuiten social media chak takah an hmuh thu sawiin mi tam takin an party an zawm belh zel a beisei thu leh, kum 2028-ah chuan Mizoramah sorkarna an siam ngei a beisei thu a sawi a ni.

Byte: Dr. K. Beichhua

Dr. K. Beichhua hi kum 2013 inthlan khan MNF ticket in Siaha bial atangin thlan tlin a ni a, chumi hnu inthlan hnunung ber kum 2018 khan a bial ngaiah MNF ticket vekin thlan tlin a ni a, MNF kaihhruai Mizoram sorkarah Minister of State lo ni tawhin, Social Welfare, Excise & Narcotics, AH&Vety leh Sericulture department te a lo enkawl tawh a, kum 2022 December ni 13 khan khatih hunlaia Chief Minister Pu Zoramthanga thurawn angin, Minister atangin banna a thehlut a, kum 2023 January thla khan MNF chuan an party kalha chea puhin an party primary member atangin chawlhthir a ni leh a. Hemi hnu hian BJP a zawm a, kum 2023 Mizoram Assembly inthlanpuiah khan Siaha bialah BJP ticket-in a ding a, hneh taka thlan tlin a ni.

BJP Mizoram State President kalchhuak Pu Vanlalhmuaka chuan amah thlaktu, President thar Dr. K. Beichhua chu a lawmpui thu a sawi a. Hmasawwna chu khawpui nilovin thingtlang atangin a in tan a ti a, party-a an awm chuan hruiatu tura an President thlan chu mi eng ang pawh ni se, a chak chuan a rualin chak takin a hnung an zui ang a, a chak loh chuan amah tichak turin hna an thawk tur a ni a ti.



CATERPILLAR OUTBREAK

Khawzawl District-a khaw pathum - Vangtlang, Chalrang leh New Chalrang khua ten an lo a an buh eichhetu hnahkhawr pangang puang chuan ziaawm lam a pan.

Khawzawl district agriculture officer (DAO) Pi Lallawmzuali chuan loneitute hnena an sem rannung thahna hlo chuan a thawk tha hle niin loneitute'n an sawi a ni a ti a. Pangang puanna Chalrang, New Chalrang leh Vangtlang khua-ah te hian tun ang hun bawr velah hian kumtin hnahkhawr pangang hi a puang thin niin DAO chuan a sawi a. Rannung suatna hlo an pek thin kha an haw ta lo deuha hriatna a awm avangin kumin hi chuan a chi dang an hmang a, a thawk tha hle niin a sawi a ni. Rannung thahna hlo an hman hma avangin an buh kungin a tuar lo tura an ngaih thu leh an buh thar pawh a tlem phah lo tura an ngaih thu Pi Lallawmzuali chuan a sawi baw.

Puan tawh angin Chalrang leh New Chalrang khua te hian lo atan ram theh inang neiin chhungkaw 210 lo-ah Hnahkhawr Pangang hi hmuh tur a awm a, heng zinga chhungkaw 70 lo-ah hian a puang nasa a. Vangtlang khuaah hian chhungkaw 80 lo-ah Hnahkhawr Pangang hi hmuh tur awmin chhungkaw 10 lo-ah a puang nasa zual a ni.

Pachhunga University College zirlaite chuan he'ng kuate hi tlawhin pangang puang hi an han zir chiang tawh a. Pangangte hi hawnin laboratory lamah an zir chiang dawn a ni.

